

Dodatak

GLOSAR NOVIH AUTORA

MEHMED ALIĆ – GLJIVA, slikar amater, rođen u Gračanici 1945. godine, slikarstvom se počeo baviti još u osnovnoj školi. U sekciji slikara amatera KUD "Adem Alić" proveo je punih 25 godina. Nastupao je na mnogim kolektivnim izložbama i priredio dvije samostalnice: prvu 2003., a drugu 2004. godine. Na otvaranju posljednje izložbe Atif Kujundžić je, između ostalog rekao da Mehmed Alić "ima snažno i stvarno osjećanje za kompoziciju, sklad i ravnotežu, osjećaj za balans i simetriju koji će se na slici postvariti kao mjera, a koja će poroditi i estetski ugođaj."

Živi i radi u Gračanici.

HIMZO DURAKOVIĆ, učitelj, rođen 1945. godine u Malešićima kod Gračanice, završio je učiteljsku školu i pedagošku akademiju u Tuzli, radi kao učitelj u Osnovnoj školi Malešići, gdje je proveo najveći dio svog radnog vijeka. Pored redovnog posla u školi, posebno zanimanje uvijek je pokazivao za bošnjačku historiju, starine i tradiciju rodnog kraja. Autor je dvije historiografske knjige: "Osnovno obrazovanje u Malešićima, 1950. – 2000." (2003.) i "Durakovići iz Malešića" (2004.), koje su izazvale zapažen interes u javnosti, posebno druga, koja predstavlja rodoslov jedne obične bošnjačke familije. U istraživačkom radu ispoljava izuzetnu upornost, preciznost i odgovoran odnos prema historijskim i drugim izvorima s kojima se u tom radu susreće.

NIHAD (HIFZE) HALILBEGOVIĆ, pravnik i publicista, direktor firme "Halkmex" u Sarajevu, rođen 1945. godine u Gračanici, pravni fakultet završio u Sarajevu, radio u pravosuđu, upravi i privredi. Jedan je od najistaknutijih organizatora otpora i odbrane Sarajeva u ratu za BiH (1992. – 1995.). Bio je komandant prvog štaba Patriotske lige u

R BiH (31. 3. 1991.), učestvovao u mnogim akcijama, od velikog vojno-političkog, društvenog i kulturnog značaja u opkoljenom Sarajevu: spašavanje vojne dokumentacije, nabavka oružja i municije, obezbjeđenje objekata od kulturno-historijskog značaja itd. Bio je član Sabora Islamske vjerske zajednice BiH od 1993. godine u više saziva, potpisnik je Menšure za izbor Reisu-l-uleme dr. Mustafe ef. Cerića, učesnik je ratnog kongresa Vijeća muslimanskih intelektualaca i dva Bošnjačka sabora itd. Napisao je i objavio sljedeće knjige i publikacije: "Činjenice o patriotskoj ligi", "Bošnjaci žrtve zaborava", "Ali Riza ef. Prohić – život i djelo", "Mama, moram im glavu dati, stradanje vojnika regruta u bivšoj JNA i njihovo spašavanje."

AHMED HAMIDOVIĆ, sudija, rođen 1954. godine u Doborocima, pravni fakultet završio u Sarajevu 1977. godine, dugogodišnji predsjednik Općinskog suda u Gračanici, dobar organizator, izvrstan poznavalac krivičnog

prava, posebno se bavi pitanjima primjene građanskog prava u uslovima tranzicije. Više puta bio je predsjednik Lokalne izborne komisije, dao značajan doprinos razvoju izbornog sistema i rješavanju mnogih praktičnih pitanja provođenja izbornih aktivnosti kod nas. Član je više strukovnih udruženja na nivou Federacije BiH (Udruženje za krivično pravo FBiH i dr.). Sa zapaženim priložima učestvovao na mnogim stručnim skupovima i seminarima, od kojih su neki objavljeni u stručnim publikacijama i časopisima.

ESMA TUKULJ – PROHIĆ, rođena 1935. godine u Gračanici, profesorica bosanskog i hrvatskog jezika i jugoslavenskih književnosti, diplomirala 1960. godine na Filozofskom fakultetu u Zagrebu. Svoj radni vijek provela je kao srednjoškolski profesor u Tuzli, prvo u Hemijskoj (2 godine), a potom u Učiteljskoj školi (8 godina). Sve do odlaska u mirovinu, 1994. godine, dakle, skoro punih 25 godina radila je u Gimnaziji «Meša Selimović» u Tuzli. Sada živi u Zagrebu.

